

Stiùireadh airson Tabhartasan Trèanadh Teagaisg 2026/27

Mu dheidhinn na maoine

Tha a' mhaoin seo ri faighinn bho Bhòrd na Gàidhlig gus taic a thoirt do dhaoine a tha a' trèanadh a dh'ionnsaigh dreuchd mar neach-teagaisg Gàidhlig no ann am foghlam tràth-bhliadhnaichean is cùram-chloinne Gàidhlig aig a bheil feum air taic-airgid a bharrachd airson an cùrsa a choileanadh.

Bidh an sgeama airson 2026/27 a' cur prìomhachas air taic do dhaoine a tha a' dearbhadh gu bheil taic ionmhais a dhìth orra airson an cùrsa a ghabhail; mar sin, bu chòir do dhaoine a tha air taic iarraidh roimhe beachdachadh air an stiùireadh gu cùramach mus tòisich iad air iarrtas.

Tha a' mhaoin seo fosgailte do dh'iarrtasan airson chùrsaichean a tha a' ruith sa bhliadhna acadaimigich 2026/27 (an Lùnastal 2026 – an t-luchar 2027) a-mhàin.

Dè an taic a tha ri faighinn?

Tha taic ri faighinn mar thabhartas airson daoine a tha comasach air dearbhadh gu bheil taic ionmhasail a dhìth orra airson cùrsa freagarrach a ghabhail.

Faodar taic iarraidh airson:

- Cìsean cùrsa (mur eil e ceadichte dhuibh taic fhaighinn bho SAAS);
- Cosgaisean-siubhail ma dh'fheumas sibh greis teagaisg a dhèanamh air a' bhliadhna den chùrsa air am bi sibh;
- Tabhartas bith-beò ma tha sibh a' faighinn Cuibhreann Neach-cùraim no Cuibhreann Cosnaidh is Taic (ESA) no ma tha no ma bha sibh ann an cùram;
- Ma tha no bha sibh ann an cùram (fo sgèith ùghdarrais ionadail) fhad 's a bha sibh ro aois 18; no
- Adhbhar eile far an urrainn dhuibh fianais a thoirt dhuinn gu bheil taic ionmhasail a dhìth oirbh is nach eil a leithid ri faighinn bho SAAS no tùs maoineachaidh eile

Bidh suas ri **£1,820** ri fhaighinn airson daoine a tha a' sireadh taic airson cìsean a' chùrsa is **£1,000** airson luchd-iarrtais eile, ged nach urrainn dhuinn dearbhadh gum bi a h-uile tagradh soirbheachail no gum faigh gach tagraiche an t-sùm iomlan a chaidh iarraidh.

Ma tha sibh a' coileanadh nan slatan-tomhais gu h-àrd, bidh agaibh ri fianais a thoirt seachad gu bheil sibh a' coileanadh nan slatan-tomhais agus fiosrachadh air mar a tha sibh air na cosgaisean agaibh a thomhais.

Cò dh'fhaodas iarrtas a chur a-steach?

Feumaidh sibh a bhith clàraichte air aon de na cùrsaichean freagarrach a leanas airson taic fhaighinn tron sgeama seo:

- Fo-cheum ann am Foghlam Gàidhlig (BA/MA Foghlam no MA Gàidhlig le Foghlam)
- PGDE ann am Foghlam Gàidhlig (Bun-sgoil no Àrd-sgoil – Gàidhlig mar chuspair no cuspairean tro mheadhan na Gàidhlig)
- HNC no HND ann an tràth-bhliadhnaichean no cùram-chloinne Gàidhlig

A thuilleadh air seo, airson cead a bhith agaibh cur a-steach airson an sgeama feumaidh sibh a bhith a' coileanadh chumhaichean fuirich aig SAAS mar [nàiseantach an RA](#), [nàiseantach an AE \(is dùthchannan co-cheangailte\)](#) no [nàiseantach taobh-a-muigh an EEA](#); a' gabhail cùrsa freagarrach le colaiste no oilthigh Albannach; cead obair ann an Alba mar neach-obrach tràth-bhliadhnaichean no neach-teagaisg Gàidhlig a bhith agaibh an dèidh an cùrsa a choileanadh; agus cunntas-banca san RA a bhith agaibh aig an àm a tha sibh a' cur an iarrais agaibh a-steach.

Chan fhaod sibh taic iarraidh tron sgeama seo ma tha sibh air taic fhaighinn bhon [Sgeama Bursaraidhean Teagaisg aig Riaghaltas na h-Alba / Leasachadh Sgilean na h-Alba](#) airson na bliadhna acadaimigich 2026/27.

Chan fhaod sibh ach aon iartras a chur a-steach dhan chuairt mhaoineachaidh seo am-bliadhna.

A' cur iartras a-steach

Bu chòir dhuibh bruidhinn ri Bòrd na Gàidhlig, cho luath 's as urrainn ma tha ceistean agaibh mu dheidhinn an iarrais agaibh le bhith a' cur post-d gu foghlam@gaidhlig.scot no tabhartas@gaidhlig.scot.

Bu chòir dhuibh iartras a chur a-steach tro phortal iartrasan Fluxx aig <https://bng.fluxx.io>. Faodaidh sibh cunntas a chruthachadh saor 's an-asgaidh air an làraich-lìn sin is tha e comasach an t-adhartas agaibh leis an iartras a shàbhaladh fhad 's a tha sibh ag obair air. Gheibhear cruthan eadar-dhealaichte den fhoirm-iarrais ma chuireas sibh a dh'iarraidh sin.

Bidh am foirm-iarrais ag iarraidh oirbh:

- Fiosrachadh mur deidhinn
- Dè an cùrsa a bhios sibh a' gabhail
- Dè an taic a tha sibh ag iarraidh (agus ciamar a tha sibh air seo obrachadh a-mach)
- Carson a tha an taic seo a dhìth (agus fianais mar a tha a dhìth)
- Mar a thèid an taic a chosg

Bidh agaibh ri fianais a chur thugainn mar phàirt den iartras airson dearbhadh gu bheil sibh air àite a ghabhail air a' chùrsa agaibh (ma tha sibh a' dol a-steach dhan chiad bhliadhna de chùrsa) no gu bheil sibh clàraichte airson na bliadhna-cùrsa ri thighinn, agus feumaidh an fhianais a bhith a' gabhail a-steach ur n-ainm, ainm na colaiste/oilthigh is a' chùrsa agus dearbhadh air a' bhliadhna sam bi sibh a' dol a-steach dhan chùrsa.

Faodar fianais a thoirt seachad gun tugadh dhuibh àite air cùrsa le lethbhreac de litir no post-d bho UCAS, bhon oilthigh no bhon cholaiste. Ma tha cumhaichean air an tairgse-cùrsa agaibh, faodaidh sibh fhathast iartras a chur a-steach, ach cha tèid tabhartas a thabhann gus a bheil sibh air fianais a thoirt dhuinn gu bheil sibh air na cumhaichean a choileanadh is gu bheil àite air a' chùrsa air a thabhann dhuibh.

Ma tha sibh a' leantainn oirbh le cùrsa, tha stiùireadh ri fhaighinn gu h-ìosal air mar a gheibhear fianais bho dhiofar oilthighean gu bheil sibh clàraichte air cùrsa:

Oilthigh Dhùn Èideann – [Certificate of Matriculation \(available via Electronic Document Service in MyEd\)](#)

Oilthigh Ghlaschu – [Certifying Letters \(available via Student Center > My Academic Record\)](#)

Oilthigh na Gàidhealtachd is nan Eilean – [Study Status Letter \(available via Student Hub\)](#)

Oilthigh Shrath Chluaidh – [Student Status Letter \(available under the "Personal" tab of Pegasus\)](#)

Sabhal Mòr Ostaig – Bidh litir ri faighinn bho fios@smo.uhi.ac.uk airson an t-àite agaibh air a' chùrsa a dhearbhadh

A rèir na taice a tha sibh ag iarraidh, 's mathaid gum feum sibh fianais eile a thoirt seachad mar a leanas:

- Dearbhadh air cìsean a' chùrsa (airson gach iarrtas a tha a' sireadh taic le cìsean)
- Dearbhadh nach pàigh SAAS cìsean a' chùrsa (ma tha sibh a' sireadh taic le cìsean a' chùrsa agaibh airson cùrsa fo-cheum no iar-cheum)
- Fianais gun d' fhuair sibh Cuibhreann Neach-cùraim (ma tha sibh a' sireadh taic a bharrachd air sgàth seo)
- Litir bho neach proifeasanta airson dearbhadh gu bheil/gun robh sibh ann an cùram (ma tha sibh airson cur a-steach airson an tabhartais mar chuideigin a tha no a bha ann an cùram). Gheibhear [mhìneachadh air dè tha ann an neach proifeasanta](#) ann an stiùireadh SAAS)

Bu chòir dhuibh an t-iarrtas a chur a-steach ro **3f air Diardaoin 27 Lùnastal 2026**. Cha ghabhar ri iarrtasan a tha anmoch ach ma cheadaicheas Bòrd na Gàidhlig sin.

Thoiribh fa-near gum faod Bòrd na Gàidhlig tuilleadh fiosrachaidh no soilleireachadh iarraidh bhuaibh an dèidh dhuibh iarrtas a chur a-steach. Dh'fhaodadh gun tèid iarrtas sam bith nach eil a' leantainn an stiùiridh seo no far nach eil faidhlichean riatanach uile na chois aig **10m air Diardaoin 3 Sultain 2026** a dhiùltadh.

Mar a thèid dèiligeadh ris an iarrtas agus tabhartas

Thèid na h-iarrtasan uile a mheasadh le phannal de dh'oifigearan Bòrd na Gàidhlig aig tòiseach na Sultain 2026 an dèidh dhan sgeama dùnadh, gus dearbhadh gu bheil buidseat gu leòr ann airson na h-àireimh de dh'iarrtasan a fhuairleadh, a rèir an fheum a tha air a dhearbhadh san iarrtas airson an taic air iarraidh. Thèid an co-dhùnadh air an iarrtas agad a mhìneachadh dhuibh tro phost-dealain ann am **meadhan na Sultain 2026**.

Ma tha barrachd iarrtasan ann na leigeas le buidseat an sgeama maoinachadh (thathar an dùil gum bi £20,000 ann), dh'fhaodadh gun tèid sùimeannan tabhartais aig na h-iarrtasan soirbheachail a lùghdachadh ann an dòigh cho-rèireach, ach ma tha taic air aontachadh do chìsean cùrsa bidh sinn ag amas air sin a thabhann gu h-iomlan.

Ma thèid gabhail ris an iarrtas agaibh, thèid litir-tairgse a chur thugaibh tro phost-dealain le Docusign. Innsidh sin dè am maoinachadh a gheibh sibh agus dè na cumhachan maoinachaidh a th' ann agus iarraidh sinn am fiosrachadh banca agaibh gus an urrainn dhuinn pàighidhean tabhartais a chur thugaibh. Mur eil an t-iarrtas agaibh soirbheachail, cuiridh sinn post-dealain thugaibh gus adhbharan air chùlaibh a' cho-dhùnaidh a mhìneachadh.

Ma thèid taic aontachadh airson cìsean a' chùrsa, thèid iarraidh oirbh bruidhinn ris a' cholaiste no oilthigh agaibh gus cunntas a chur air dòigh gus an urrainn dhuinn ur cìsean a phàigheadh thuca gu dìreach. Ma tha sibh air pàigheadh airson cìsean a' chùrsa mus robh co-dhùnadh ann air an iarrtas agaibh, faodaidh sinn fianais iarraidh gun do phàigh sibh a' cholaiste no oilthigh airson 's gum pàigh sinn an t-sùm thugaibh.

Ma tha tabhartas air aontachadh nach eil ceangailte ri cìsean cùrsa, thathar an dùil gun tèid an tabhartas a phàigheadh nuair a thilleas sibh an litir-tairgse agus dearbhadh air an fhiosrachadh banca agaibh. Ma tha sibh air maoinachadh fhaighinn a-cheana, feumaidh sibh aithisgean adhartais a chur thugainn airson nam bliadhnaichean dhan d' fhuair sibh taic is aonta fhaighinn airson nan aithisgean sin mus tèid ur pàigheadh airson an tabhartais ùir agaibh.

Nach cuir sibh fios san fhoirm-iarrtais agaibh, no fios gu sgioba nan tabhartasan aig Bòrd na Gàidhlig aig tabhartas@gaidhlig.scot, mas e 's gum biodh clàr-ama pàighidh eadar-dhealaichte nas freagarraiche dhuibh.

Mur eil sibh riarichte leis a' cho-dhùnadh air an iarrtas agaibh, ged nach eil pròiseas ath-thagraidh againn faodaidh sibh gearan a chur a-steach ma tha sibh den bheachd nach deach dèiligeadh ris an iarrtas agaibh a

rèir an stiùiridh seo is a rèir an stiùiridh-measaidh. Airson tuilleadh fiosrachaidh, [gheibhear na modhan againn airson dèiligeadh ri gearanan an seo](#).

Sgrùdadh is measadh air adhartas

Mar chumha den tabhartas agaibh, feumaidh sibh aontachadh ri:

- Crìoch a chur air a' chùrsa dham bheil sibh a' sireadh taic;
- Aithisg adhartais a chur gu Bòrd na Gàidhlig ro 13 Lùnastal 2027; agus
- Gealltanas a thoirt seachad gus an t-ath cheum a ghabhail a dh'ionnsaigh teagasg ann am foghlam tro mheadhan na Gàidhlig, le bhith:
 - A' leantainn oirbh dhan ath bhliadhna den chùrsa;
 - A' leantainn oirbh gu bliadhna-phrobhaidh teagaisg; no
 - A' leantainn oirbh gu dreuchd teagaisg no tràth-bhliadhnaichean Gàidhlig

Dh'fhaodte gun cuir oifigearan Bòrd na Gàidhlig fios thugaibh fhad 's a tha sibh a' dèanamh a' chùrsa agaibh, feuch am faigh iad fios gu neo-fhoirmeil air mar a tha e a' dol dhuibh.

Mas e 's nach cuir sibh crìoch air a' chùrsa agaibh, no ma nì sibh co-dhùnadh gun a bhith a' leantainn dreuchd ann am foghlam Gàidhlig, feumaidh sibh fios a chur gu Bòrd na Gàidhlig **sa bhad**, le dùil gum bi agaibh ri pàirt den tabhartas a thilleadh a rèir na tha air a mhìneachadh san litir-tairgse agaibh.

Tuilleadh fiosrachaidh

Airson tuilleadh fiosrachaidh mu dheidhinn maoineachaidh, nach tadhail sibh air [làrach-lìn Bòrd na Gàidhlig](#), no nach cuir sibh post-d gu tabhartas@gaidhlig.scot.

Faodaidh sibh cuideachd sùil a thoirt air [freagairtean ri ceistean cumanta](#) mu dheidhinn a' mhaoineachaidh againn air an làraich-lìn againn.

Gheibhear fiosrachadh mu phrìobhaideachd a thaobh ar sgeamaichean maoineachaidh [air an làraich-lìn againn](#).

Gheibhear cruthan eile den stiùireadh seo is de dh'fhoirmichean-iarrtais, ma tha sibh gan iarraidh, agus dh'fhaodte gun tèid am foillseachadh aig: <https://www.gaidhlig.scot/gd/maoineachaidh/cothroman-maoineachaidh/tabhartasan-treanadh-teagaisg/>

Eachdraidh Faidhle

v1 – 13 Iuchar 2026 – Air fhoillseachadh